

ZION THUSUAK



REVIVAL CHURCH OF GOD (RCG)

Vol. XXVII

JANUARY-FEBRUARY 2023

No. 137



THUPI:

“Himaleh, kuale Lalpa ngak tapo chu a hatnau sukthak zel hintin,.....lam zawt zawt maleu le basam diak puanau”

Isai 40:31

Editor: Rev. Dr. Khupkam Vaiphei

ZION THUSUAK

Editor:

Rev. Dr. Khupkam Vaiphei

Associate Editors

1. Rev. Liante
2. Rev. Ngulneipau

Contributing Editors:

1. Mr. Kh. Sang
Vaiphei
2. Rev. Kailum

Board Members:

1. Upa Mangkam
2. Pro Pastor
Lianboi

A SUNGAH THU UM TE

	<u>Page No.</u>
1. Editorial	01
2. Nunglam ah thil umte chu Hemil in..	02 – 05
3. Kumthak Ginna Thucha	05 – 07
4. Ki Siamphat Hun	08 – 12
5. Ginna ah Thamuanna	12 – 13
6. Kochuam Ki Thununna (Church Discipline)	14 – 16
7. Joint Conference Report	17 – 20
8. Sunpina	21
9. Pauchapna Hiatding	22
10. Kipakthu Genna	22
11. Hetsakna	23
12. Zion Thusuak Magazine Agent List	24

NOTICE

Zion Thusuak article zosia hi thugin lam thu ah editorial board ten maw pawkna akinei puan, article hun piate mawpuakna ah kawi ahi ziakin dawtnawp a um chun, amau dawtzawk dingin ka hun genchian uh a hi.

By: Editorial board ZT

Editorial...✍

Unaute amasan I Lalpau leh ei Hukdampa Jesu khrista min in kumthak 2023 chibai.



A masan kumthak 2023 eipui la'ng kai ah Zion Thusuak January – February 2023 issue suazawm thei dingah damna leh hunpha ei piatu Pa Pathian chungin kipak thu ka hun gen masa'n, lopina leh chawihawina ama ah hizing ta hen.

Hetmanlo gual in kum 2022 kum chu abei ta mai in, mi khen khat in kumthak 2023 mu man ta lo ah eila mual liamsan mi phabep khat a umzing lai in, Lalpa'n amau taw kibang lo ah ei uh ah dingah kumthak 2023 ei musak ah damna te eipiak ziang thu ahin lunggel leh kingaituana la nei kha him him em unau, kei kaki ngaitua le Lalpa'n lei ah ama na sepding um nalai te sem nalai dingah dawisakna ei nei zia kin hiti hin kumthakte eimusak ah maban sunzawm thei in ei kawi ahi ti ka ngaitua nan ahung um in, Lalpa chungin kakipak ma ma in, kakipakna thu avel in ka hun gen kit in ahi. Hatlo leh ting lo kawm kawm ah khawsa ah um hita maleng le Lalpa eidawisakna te ka geldaw chun, mawk um thim hiat hiat ah, tekse ten ni asuak ngai ah suak, atum ngai ah tum ti gual ah mawk ngai tam mai mai lo ah ni leh thate, hun leh phatte aman tam dan te hi ei mu daw sak in avel in lopina leh chawihawina Lalpa ama ka pia'n ahi.

Unaute tukum 2023 kumthak imu zia k ah kisiam thak mai mai ding hizaw lo in, Lalpa'n Ni leh Tha, Hun leh Kum te hi a siam ahi ti hedawk zawi tiu in, zia gual ah kum leh tha siampa Pathian a ding zawk in hun leh phat te haw hi agam kekletna ding leh, amin lopi zia puangdawk zawthei dingin la umna mun in ki ngaitua thak in lang, panthak hun la chiat ding in Khrista Jesu min in simtute zosia la lengun chialna ka hun nei hi. Lalpa'n kumtung tianga hun umpi in hun hihat zel ta hen. Halelujah Amen.

NUNGLAM AH THIL UMTE CHU HEMIL IN...

Rev.Dr.Khupkam Vaiphei

Bible cha'ng Philippite 3: 12-14.

12 A changzo ta ah kingai ka hi puan, bukim tasa gual ah kingai le ka hi diak puai, himaleh, Khrista Jesu'n ka sep daw dingah ei hiatsak chu ka sep daw thei na dingin ka zui ham ham zaw ahi

13 Suapite haw, ka sep di chu sem zo dan in kaki ngai nai pua: himaleh, zia thil pakhat hi ka hi chu ahi, nung lama thil umte chu hemil in, malama thil umte chu ka del tei tei sek ahi.

14 Khrista Jesu ah Pathian ei kona sangtak kipak man chu mu dingin kunglam chu ka del ham ham ahi.

Unaute, zia Bible cha'ng apat hin Lalpa'n ei holim pina bang gual ahi em vak enkhawm hi tiu aw. Pu sawlchak Paul hin agendan hi, nang hile chun ziagual hin kampau lanei na diam? Vak ngaitua him him tia! Ama hin, Lalpa Jesu Khrista vak ah hung kilang kha amit in kichian tak in amu, a aw le abil in ahia ahi, zia zaw a khan nithum sung khua mulo in ala um ah, khua ahun mu mu in tui Baptisma ala changa, Baptisma achan zaw in, Khrista Jesu Pathian chapa diktak, ama zal ah bangkim hi siam leh um ahi ti ahun hechian ta, ama Jesu hi kumtuang hinna lampi ahia, ama ah tilo kuama Pa kiang tungthei lo ding ahi ti amu chian ta, zia haw ziak a khan Paul hin Pathian thu tichu Jesu tatna chanchinpha thu hi ahun gen vel ta, mitampi tak in Jesu a Lal leh Hukdampa ding in ahun kisan zung zung tau in, zia hun ahin Paul hi Rom ah suangkul in a um zing lai in Phillipi te kiangin zia lekha hi ala thawt ahi.

Paul in a tha a sim ah, phat sawtpi Pathian thu ahun gen ah, Pathian sawlna nasepte tampi ahun sep daw nung ahita, himaleh, ama khan, suapite haw a chang zotasa ka kingai puan, bukim tasa dan inle ka ki ngai puai, ka sep di chu sem zodan inle ka ki ngai nai puai, abang di chu hita le, nunglam a thil umte hemil in, Khrista Jesu'n ei kona sangtak kipak man chu mu ding

in kunglam chu ka del ham ham ahi ala tin ahi. Ei lawi kihi le chu Pathian na kasepna asawt ta, sem bukim keitai, ka chan dingte le ka chang tai, ka bukim ma ma hi kiti maithei ahi. Amabo ama Paul hi kisit ma ma kawm in thu ala gen zaw ahi. Pathian in a ngansiana nasep ding hi tampi kisem le ti ama lunggel hi ngei dingin ka ging cha'n ahi. Nunglam ah ala sep phat te him him kisan na ding le kisuklatna dingin bangma gen lo in a hemil tawp ahi. Nang leh kei vang napha ila sep khak te kha min hepawkhana ti gual deu in gen gen ziang ding ti hi ahi sek hi.

Paul in Jesu amu chian ziakin, chuleh a aw a bil ngei in ala het ziakin, lauthawng nan a dim ah, kha bang ah kihatsak, bawlthei leh pil kisa ma ma khan, thunei chung nung pen Jesu amuni a pat khan, ama lunglo lam ah hinkhua amat khak ding lau zen in hun leh phat te kha ahun mang tota, tichun, ama Jesu umpina changin aki het ziakin khawvel mite him him lau anei ta pua, gilkiat dangchak a thikhak ding le alau ta pua, mi gensiat leh simmaw ding le khawksakna him him anei ta puai, a ziak chu bangkim bawlthei Pa Jesu thupiak leh sawlna bep kha suk bukim ding kha ama lunggel leh nasep bep ala hi ziakin thil dang him him in ala subuai pha talo ahi unau. Tulai in nang leh kei chu, Pathian lung hawlana ah mi eigen siat khak ding lau, Pathian thu ziak a haksatna tuak khak ding lau, hiti chun Pathian chu bangma bawltheilo ibatsak kha sek un, ginna neilote chu kisuak kha ta sek ahi. Bangkim ah Pathian muan ngamna hi ahi Lalpa'n a daw. Lalpa Jesu'n nanghaw keima ah la umzing ua, ka thute le nangmau ah a um zing chun, la nawp nawp uh hun dawn thei in la tin uh, zia tak chuleh hi piak ah umdi la hui. Ati ahi. Johan 15:7

Paul in ala kimupi Jesu ah a umzing ziakin khawvel mite kuama lau neilo in ala um muang zo in, tichun, hangsan tak in Pathian thu helo te kiangin chanchinpha ala gen in, asawlp a Jesu lunglam kipakna ding bep sem in ala um ziakin, Khrista Jesu'n eikona kipakman sangtak mu ding kinem in kunglam ka del ham

ham ahi ti hi alagen ahi. Unaute, Lalpa'n kipakman apiak ding kinem in ana bang chan la sem ta em?

Pathian lunglam leh dawilam ah a nasep a thugen kiti hi mitin in abawl dinga Lalpa'n pha asak chu himaleh, eimau haw ei huap phalo gual ah ila umkhak seknau hi a ziak la ngaitua kha sek em? A ziak dik tak hi, nang ama ah la um lo ziak ahi ti hi Jesu kamsuak ah kipat in muthei ahi. Ama ah I um sek lo ziak in buaina leh haksatna ahung tun hun inle a thawkdan ki thiam tasek lo, athawk dan leh a kha'n dan bangkim chu ama ah umten a hethei un thepna ti ding a hem haksatna ti ding ahem chu bang gual hi ziang lele ama Jesu zal in a zothei sek un ahi. A ziak chu bible in hitihin eihil ahi "Ama ngei chun thep ah umna chu tuaka, a thawk tak zia kin, thepna tuakte chu apanpi ngal thei ahi" Hebraite 2:18.

Paul inle thepna tamtak ala tuaklo hilo ahi, maleh zia ah kipat chun Ama Jesu zal in ala zotou pek ahi, kum 2 sung bang kha Rom ah hen in ala um ah, Nasepte 28: 16, 30. (House arrest) ziasung a khan a umna inn in mi akokhawm sek in Pathian thu ala gen zel sek ahi. Suangkul ah khum ahilai inle chawl nga diaklo in Ephesa te Phillippi te Kolosate etc. kiangin le lekha ala thawt zing ahi. Paul in akopa kipakna ding lung hawl in suangkul ah a umlai tiangin le hukdamna chanchinpha thugen haidiaklo in a gen zing ahi. Ahile, unaute, eihaw hila suangkul ah tang le kihilo, hun awng anei ah kinei ma ma ziang, Pathian a ding mawng mawng ah hun leh phat piakding ticha le gello in um ziang hi adik thei na diam? Lalpa'n bang gual in ei mu diam? Gingtu khat la hi ngal le, la gin Pathian a dingin la hun neukhat bek la piak ah, lanei neukhat bek la piak chu pha hilo maw, zia haw chule, nangma phatchuam na ding ngen hinalai, Paul ama ngei in "Lungawina leh Pathian ngaisakna hi lawkna thupi tak chu vang ahi him ahi," ala ti ahi. 1 Timothi 6:6. Pathian lunglam nasepna hi eimau lawkna ding ngen ahi ti hechian leu hin hiti hin ki um mai mai lo ding eive maw. Tulai ahin mi khen khat hi ama lawkna ding ahilo le khawima le pawtdawk nuamlo mi le um ahi, kochuam thu taw kisai ah pawtdaw ding ahem, sepding

ahem a hung um phat le, inn ah aseping abawl ding khawk um gual ah um ah kilep mile um tho ahi e, lungkham chu ki um tho ahi. Lalpa'n eikimupi henlang eidawng ta le bangtin la dawn hu diam kigel thak tia, min Pathian ahun muchian ah, ama nungjui dingin a hung kipat daw takle, akotu pa Pathian lung hawl in ahun aphot te leh aneite mangcha in anung azui sek u ahi, nang bangtin Jesu la mu em, ama dingin la hun la phat chuleh lanei te la phal thei ta diam? Paul in Korinth mite kiangin tu damsung ading bep ah kinepna nei gingtu la hi chun mi lak lak in milungsiat umpen hiding la hi eiti ah. 1 Korinth 15:19.

Tukum 2023 kumbul apat sa hin ki ngaitua thak hitiu in, Lalpa dawilam leh akipakna lam ding lunggel nei in ama na sep daw tam dingin kigel hitiu in kal suan pan ta leu hin Lalpa'n imamaw teu ei pia na lo ding ahem kati, ama ging ngam in ginnan kalsuan pantaitiu unaute. Ama vang Lalpa a dingah kalsuan ding la guat nile la chungah melmapa setan thil guan hung kipan ngal intin hun zui ngal ding ahi, ahinla ama sangah pilzaw, hatzaw Lalpa'n ei umpi ahi ti in lungkham kei lo in maban sunzawm zel ah malam nawt tou zel thei dingin Lalpa'n hun malsawm ta hen, Amen.

KUMTHAK GINNA THUCHA

Upa Songlianthang Vaiphei Imphal

2022 kum mang zo ah hun thak leh kum thak 2023 galkai thei ding ah ei mapuitu, lopina ka hun piat, aw Lalpa Hatchungnung Pathian.

Mi zosia kinepna “kumthak phat le chu zia gual hin bawl ka, zia gual hin sem ka”, ti lunggel nei hi atam zaw hi ding in ginchak ahi. Lekha sim ten le aban chon ding ti chu a umsa ahi. Ahinla,

naupang lekha sim zing lai te kum 2/3 sung ale maban hung chon zo talo, asim ngaima simzel ding a um chun nu leh pa kipâkna ei puai. Lekha sim zosiate hi graduation tiang a zaw na ding uahin atangpi in kum 20 tiang sung hi um leh umlo leh chomkhawm in nu leh pa te hin pan ilak zing uh ahi, kinepna liantak nei pum in.

Kumthak 2023 I zawt pat zinglai uhin, khawvel ah Pathian thilsiam, etsakna- nisuak leh tum hun leh adang dang bangma akisang, azat chuamna um diaklo ahi. Kumthak hin bang ma athak hung pualut zing ziang lo ahi. Hun thak leh thil thak muna ding ahin nangma ngei thil siamthak la hi ngai ahi. Eima ah thakna apat chun thil zosiate thak leh a danglam ah muthei bep ahi.

Kumthak I zawt pat zinglai u hin, khawvel taksa nek leh chak chuleh inchen lochen inle panthak lak dan ding guanggalna inei thei ua leh, bang atia I ginna lam ua le pan thak lak ding dan ngaitua khalo tamtak umsek ihu em? kum tamtak nang haw sang ah Khristian ala hi ka hi tai, kum tamtak lawiupa dinmun ala pang ka hi, ti haw hi eima Khristian lawi upa khenkhat ngaidân leh kampau inle ala pawt sek hi. Tamtak kala sem tai, ahun tai, ti ah kiheisan thei Pathian hilo ahi. Pathian nasep sepkhol ah cholsan thei hilo ahi. Hebrai 3:14 na a til ah kipat I ginnau kingakna kha a tawp tiang ah I tukdet ua chun, Khrista kikawppi te chu ihi tau hi. kum 10/20 masang lai I dinmun kha tuni chan ah bangma machalna neilo tampi I um thei hi.

Kumthak I zawt pat zing lai un, eima dinmun kha sangtak ah kikawi (min chu ei kawî lo) ei ma ah Pathian Thagau um leh piangthak ah kum sawtpi ala um ta ahi nung ale I insak – inthang te kiang ah Pathian Thagau ga – Hepina, Kipakna, chamna, dawtheina, nunnemna, Phatna, Ginumna, Thunuaigolna leh kisumtheina eima apat suklatna nei khalo leh mite“n eima apat semdawk theilo (piangthak ahi diam?) chun, 2.korinth 3:2 a chun „nangmau chu ka lekha chu la hui, ka

lunggil sung ua kizik, mi zosia het leh sim chu la hui hi,“ ti ahi ngal a.

Kumthak I zawt pat zing lai un, damlai chawmcha hinkhua siamna a bawn kum 20 tuam thiamzilna le nuai bangjat ahem kisen (mangzo) khawk salo ihu. Kompetision lawtinna ding ah bangzat sum lut leh le gold medal muna ding ah kum bangzat kizil ding – lawtinna a um chun kigun (kituak) isa tho sek ui. Chawmcha vak bawl zia mai ah, vak thawdok zia mai ah piangthak hiziang ding chu zia gual mai ah kumtuang hinna mu leh chan ziang thei hilo ahi. Hun chawmcha hinkhua siamna khel in thupizaw ngei ding ahi.

Kumthak I zawt pat zing lai un, tulai gingtu tamtak hi – Sunday Khristian biak inn sungmai Khristian atam ah, chun tulai Khristian khenkhat ngaidân –thawlawm tamdeu, sawmahkhat tamdeu, kikhom mundeu, Khristian hisa eima pawlpi pulut tamdeu leh a dang dang bawlfu thim te haw hi piangthak dinmun dan ah um ziang kitam ahi. Ahinla, Pathian a ding in vang a buting a poimaw hi. chun kumtuang hinna hi chu zia gual lawm ah mantawm leh bailam ah mu ziang thei hilo ahi.

Lalpa'n zia thugualte apat hin simtu zosia hetthiamna peta hen. Amen.

KI SIAMPHAT HUN

Bawlphat ngaite bawlpha ding in

(DO IT RIGHT,NOW!)

GL Muana Neitham

Ama nu chun, “ Lalpa , kuama’n thiamlo ei chansak puau hi,” ti’n a dawnhu a. Jesu’n a kiang in, “Ke’nle thiamlo ka hun chansak diak puai, chia’n la, gilo kit ta kin,” a tia. JOHAN 8:11

She said, “No one, Lord.” And Jesus said, “Neither do I condemn you; go, and from now on sin no more.” John 8:11 ESV

Khawvel ahin keima mimal hinkhua hin bangti lom² ei diam aw, tigual a haksatna katuak mai. Mite, midangte la keisang a pha leh hoizaw ahiloleh thiamna lam a le thiam zawkna le a chuam nei biklo ahiu a,ahin la, ahinkhua uh nuam tak a mang,sum le pai hihenla nei leh go la kiting tak ah a nei un TIN Ngaituana lanei khasek em unau? Khawvel a mihiam khat a hung kipiang, ngaituana nei aki hiziak in midang tawh ki teehna@Comparision aki nei khasek him ahi. Zu le sa ne a, khamthei guithei bawl leh zuak ngal ua, dik tatna la neilo, Pathian thu kilepna mang ahiu la kihechian mama ngal a, bang atia malsawmna, sum le pai nei a, hausa teitei ei diam uh aw tin la lungthim in la geel KHA sek hi maw?

Khawvel sum leh pai, sanate, hausatna leh nawpsakna pia ding in Lalpa Jesu'n khan a nungzuite atiam lo ahi! Jesu Krista a chamna leh thamuanna ama Gingtute atiam ahi zawi. Pathian thil leh khawvel thil hi khendan leh hethiam ding in Lalpa'n mitvakna ei pia hen aw..Amen!

Laa akisak sek gual ma in, khawvel a sum le pai, hausatna, lopinate leh lalnate hi hung mangthai paiding ahi. Kumtuang dai mama lo ding ahi e. Amang thai theitalo ding Jesu a Hinna lanei lo chun tuhun mama hin kingaitua phat hun ahi e unau.

Mite et a kilom biakinn mi maimai ihi khak chun Pathian vaihawm khumna maitua ngei ngei ding ihi zia hun ding chu ngaingam um puantin..kisik na hun..kisiamphat nahun umta puantin maw?!

Belamte Khrista Kochuamte damtheina ngaisaklo leh kochuam mite thagaulam a khawksakna leh hepihna neilo Belampu lem a tam mama hi. Sum muna ahiloleh nek muna ahisam leh ti a mawpuakna suh piting ve mai mai gua kochuam nasep tam to zel ding ahi. Zia gual ihi khak chun kisik a Pathian lam a kihei kit mai ding ahi. Mite mu leh ngaidan in vang kilom maimai in um thei nanla hinla vak ngaitua tia lei leh van siamtu Pathian hin ei muchian mama in ei hechian mama ngal a,themzo ding khatto a kigeel lahem? Kochuam nasemtu reverend kiti ut ve haw, pastor hi ve sam chun pensioner khat hitasam hinla ahindan leh khuasak dan ua apat ah ettawn ding um mawng mawnglo puitu lem igam hin atam talua tai!

Pathian Kochuam leh ki vaipuakna ahin vang belampu lem leh lauthawng um mama, mahni gilpi ding bep buaipei te kichepna ding mun hilo ahi. Kochuam hi kichepna hilo ahi. God is not mocked!

Insak, inthang khuasung leh vengsung leh kochuam ten khawvel siatna leh سوالنا hi hung ngainep deu deu ding ahiu.

Pathian thutak dinpi ngamlo hung tam sem sem intin. Mani tumpi @ gilpi sung a ding bep buaipei lawi upa kibelap deu deu intin. Sual chu سوال tingamlo,gitlona chu gitlona ti ngamlo leh setan matchak Belampu سوال thim apat hukdawk ngai hung kibep deu deu ding ahi

Biakinn kikhawpna kochuamte thawlom atam zaw phawt nak leh lungawi ziang mai hotu hung tam deu deu ding ahi.

Kristian te chu ginna leh Bible ei zilsakna thu him him ah ki compromise leh common ground hawl ding te hilo ahi. Bible in NO ati chu NO tiding chuleh Bible in Yes ati le Yes timai ding ahi.

Pathian thugil diktak hi hechian nuam leh hinpi ngam Kristian igam hin a mamawh mama hi. Kristian kiti khat Bible sim peilo leh Pathian thu Pathian kilakna athu hing ngaisak peilo, Kochuam upa leh pastor le hotu hi ut, vaihawmna lalchutpha chut ut Jezebel thagau buak nei igam hin atam ngei mai!

Tuni hin kingaitua hitiu unau, la Insung mite Jesu lampi diktak in lapui in, la kaihuaina em? Biakna lam a panmun nei lawi upate nang belampu lahi em? Ahiloleh belamte'n ahung etkawl ding ua um Belampu lem khatto lahi em?

Jesu neiten vang zia khawvvel ahin Pathian thagau mapuina in سوالنا te chu azo to zel un ahi

Pathian chaten vang khawvel a hing zing kawm in Vanthil te thiil in, van hausakna akikawp pi zing sek un ahi. Jesu Krista hepina achun khawvel thilte chu mangthai pai ding ahi dan amu chian mama tau in ahi. Thina, gawtna, chagatna ahiloleh le diklo tak a bawlana te chun a Pathian a hepinau chu ahi det deu deu tu in apang sek hi. *Sizo changal mepok guak le hukdam chate chun sa tuipen sang in tuitak in ane thei tau in, taksa leh thagau lam in hatna leh damtheinan amang zaw sek uh ahi. Hinla Pathian neilo te vang chu sana kuang in me leh bu tui theipen ne leu le ataksau ading in gu asuak sek in , imut theilona, lungkham lungngainau akibelap sak sek tu in apang zaw ahi.

Pathian neilo ten leisiat hinkhua hi anuam theipen in amatgua zing un, amau a ding in ahinkhua nawpna pen uh a best life uh chu khawvvel thil ahimai hi. Pathian vaihawmna amaitua ni tak uh le chu best life uh kha a worst life hita mai ding ahi. Khawvel a happy life leh best life mang ding le nawp tel ding in Jesun' ei ko ahi puai Nisin a Krista hiatpitu ama thawkna thawkpi ding in leh khawvel nawpna te nusia ama zui ding in ei ko in, ei ziltil zaw ahi .

Pathian nasem ahiloleh mission worker khat hingal a, Pathian na leh Jesu amasapen a koilo a, pension nung a best life mat ding dan buaipi, Krista a ki insured lo a khawvel thil insurance buaipi

a, a petu nasep ding sang a sum bep la buaipei chun....La gitlona kisik in SUAL lahi kisik mai in...REPENT!

Unau la nek hawlna, sum kawlvaina leh la hinkhua matna vak ki enthak kit tia le, Bible Pathian thu tawh akimil na diam! Sum pung hawl leh commission hawl a zuau gen vel vel a Kristian gimnam bei a khuasa lahi em? Gam government in le akham, gamlak ganhing, ganchate thading ah hawl vel vel lahi em? Khamthei guithei bawl le zuak a khuasa lahi em? Sual hi haisan in, nang ding hunpha umsawtlo ding ahi.

Hilo hial! Ka hil la hiu, nang unle la gitlo uh la haisan lo ua leh, zia gual ah chun mangthai ding la hiu,” a tia. LUKA 13:5

Himaleh, Pathian suangphûm det tak chu a ding zing ah, zia tepte’na hi a nei hi: “Lalpa ‘n ama â te chu a hia’i,” ti leh, “Lalpa min lam tapo in gitlona kiheisan hen,” ti hi. 2 TIMOTHI 2:19

Taksa damtheinate, lunggil kipakna te, chantawk a lungawinate haw hi Pathian a kipat ahi. Unau Insak inthang leh khawvel et in vang tawm leh musit himaithei lahi, hinla nang a um amangthei talo Krista a hukdamna khan bangkim in thamuanna, kipakna leh sual zawnha Thagau THIANGTHO pawlna zalin nei zing tading lahi

Jesu nei gingtu diktak te chun chagatna, gentheina leh hausatna khawvel mite mutheilo in anei zing un ahi. Jesu anei un, amang theitalo ding hukdamna, Kumtuang hinna anei tak ziak un....KHAWVEL THILTE hi Mangpha bye bye a pia zing tau hi

Khawvel thilte mangpha tau in, Jesu kanei, Jesu kei ading in ahuntawk hi tithei ding in Lalpa'n simtute ei malsawm tau hen

Thiamlo chansak chu kua a hem? A hung thi Khrista Jesu kha ahi; ahi ngût hi, a thokit ah Pathian khut changlam in a um ah, ama chun ei pauchap piak zing ahi. Aleh, Khrista hepina ah kipat chun kua'n ei khen zo ding a hem? Thokgimna'n a hem, lungkhamna'n a hem, sukgentheina'n a hem, kial in a hem, ngawnchang hi'na'n a hem, lau umna'n a hem, chemjam in a hem, ei khen zo ding ahi diam?. ROMTE 8:34-35

Bible Simding: Mathew 35:3-16; Mathew 11:29; John 15:4; Mathew 6:33; Acts 3:19; IJohn1:9; Ezekiel 18:21-23; IJohn 4:1; Colossians 2:8; 2John 1:7.

GINNA AH THAMUANNA

Rev.Dr.Khupkam Vaiphei

Executive Secretary RCG

2021 March-April Issue repeat

Bible changtel Romte 15:13.

“Thagau Thiangtho thilthitheina ziaka kinepna lian tak nei ah la hung um theina dingun, Ginna ziaka thamuanna leh kipakna zosia ah chun Pathian chun hun hidim ta hen”.

Thamuanna leh kipakna ti hi Ginna ah kipat chan ding nei ding ahi dan pu Pual in Rom mite kiangin ala gen hi hawi deu in ngaitua thak tiam hi hitiu. Ginna hi min anei le bang kim in abuai ngai lo uh ahi. entiamu, Ginna ah lawichan thumte kha, 1,Sadrak, 2,Meshak leh 3,Abednegaw ten Pathian taksanna leh ama ah Ginna ala nei ziakun, Lengpa Nebukanazar in milim lian tak a siam ma ang ah mipi zosia bawkkhup a hochiat ding, kuale milim anga bawkkhuplo te chu meipi kuang sungah selut ding ti thupiak amat lo ziakun, Lengpa kiangah hek in a um ua, Lengpan thudawt anei lai in a dawnhu nau thuchang kha ahi kagen nuam pen chu. “Aw Lengpa, ana ka sep uh Pathian chun meipi kuang lutlut lak leh nangma khut ah kipat ei hukdawk thei a hi chun, ei hukdawkmai hen” (BSI) (TBS in vang hiti hin agen a, ka Pathian chun ei hukdawk ding ahi’ ati ahi). Ahinla, a chutilo tak leh le, aw lengpa, la sana milim siam chule ho diak lo ding ka hui ti he ta’n, tin a dawn hu tau ahi. Danial 3: 17-18

Amau cheng thum khan, thupiak amat lo ua ahile, Meipi kuang lut lut lak a selut ah um ding ah iu ti thu ah et lai un, adawn hunau thuchang khu Ginna/taksanna neilo ten gen ngam kei lo ding ah iu ti hetthei ahi, a zia chu bible ah Hebrai ziktu'n ala gen, 'Ginna chu thil um ngei, i kineppi, mu chu hinailo, himaleh, hiatchianna i nei thei chu ahi' ati ahi. Hebraite 11:1

Pual in Rom mite kiangah ala gen 'Thagau Thiangtho thilhitheina ziaka kinepna lian tak nei ah la hung um theina dingun, Ginna ziaka thamuanna leh kipakna zosia ah chun Pathian chun hun hidim ta hen' ati hi, eimau a um Thagau Thiangtho chun zia kinepna chu eineisak in, kinepna gual ma in ei mu sak ahi ti aki chian ahi. Ginna iti hi Pathian Thagau Thiangtho panglo in umtheilo ahi, mihing ngaituana chun vakgelthei himaleh, Thagau panglo in taksanna umtheilo ahi, lataksanna chun lakinepna ahun sukpitin ding ahi ti he chian chiat hi tiu.

'Aw Lengpa, ana ka sep uh Pathian chun meipi kuang lutlut lak leh nangma khut ah kipat ei hukdawk ding ahi' ti thu vak gen ngam ziangna hi Ginna/ taksanna dik tak chu ahi. nang lahaksat lai leh la bei dawn lai ah Pathian la muang ngam na em? La Ginna chun ahun thamuan zo tak tak na em? Ki ngaitua thak chiat hitiu in, Thagau Thiangtho thilhitheina zal ah kinepna liantak nei inle, Ginna ziaka thamuanna leh kipakna chu nei thei dingin lalpa'n athu igen teu ei hun malzawl taken. Amen.

Kochuam Kithununna (Church Discipline)

Rev. Liante, M. Th., in Christian Ethics

Thumapui

Kochuam kithununna (church discipline) hi mi khenkhat in Pathian thu tawh kituak a sa zo puau ah; khenkhat in taksa mihing dan mai gual in a gel kit ua; ahiloleh, khenkhat in thagau mite bawl ding in a gel lo uh ahi. Aziakchu, thagau mite chun hepina nei ding ahi tiin lunggel a nei ua, tichun, hetthiam lo ziakin a bawl da lawi leh bawl ding ah phasa lo lawi a um sek uh ahi. Himaleh, kochuam kithununna hi mihing lunggel ei pua, Pathian lunggel zawk ahi ti Bible ah kipat in muthei leh hetthei in a um ahi. Zia te lak ah chun khenkhat abiktakin Lalpa Jesu leh Sawlchak Paul ziltîlna tam lo cha vak en hi tiu.

1. Kochuam ah kithununna hi kochuam mite'n a bawl ding ua Lalpa Jesu leh Sawlchak Paul ziltîlna ahi.

Amasa'n, kochuam ah kithununna (discipline) hi mihing dawidan ahi pua, Pathian dawidan ahi zawi. Lalpa Jesu'n, "*Mi gensia (vaihawm khum) kiu in*" (Mtt. 7:1) ti'a a gen hi kochuam kithununa ah lak di ei puai. "*Kochuam sung ah mi pakhat in la chung ah thil hikhial taleh, chia'n la, ama leh nangma bep het in a gitlona hil in. A hun ngaithak leh ama chu la thuzaw hi tan'a. A ngai nawp lo leh vang mi dang pakhat a hem, pani a hem pui inla, thu zosia chu hetpi pani ahem, pathum a hem kam ah sukdet ah a um thei na ding in. Chutia, a hun ngaisak diak lo chun, la thû chu kochuam ah tut in; chuleh, kochuam le a ngaithak nawpdiak lo ahi chun, ama chun nang a ding in Jentel leh sedawlte gual hi ta hen. Titakzet in ka hil la hui, lei ah la kân uh chu van ah le kân hi'n tin, lei ah la thap uh chu van ah le thap hin'a*" (Mtt. 18:15-18) ti hi Lalpa Jesu'n kochuam kithununna thu ah ei ziltîlna ahi ti hetthiam akûl hi.

Chuleh, Sawlchak Paul in Lalpa Jesu thuhilnate hi a ngaikhawk ziakin Korinth kochuam inle a bawl ding un a phût ahi. (Mtt.

18:20 leh 1 Kor. 5:4 enkâl in). Sawlchak Paul in, “...*Zia gual “mi chu lungngai pi nak sang in, lululna’n la mang zawu ah; a thil bawlte ziak ah chun la lak ua pat nawdawk ding hi zaw lo a hem?.... Zia gual mi chu a thagau Lalpa Jesu ni ah hukhin ahi thei na ding in, a taksa chu himangthai ding in Setan kiang in piadawk un....La lak ua migilo chu nawdawk un”* (1 Kor. 5:1-13) tiin Korinth kochuamte a ziltîl ahi.

Tuni khawvel ah kochuamte lak ah hin Sawlchal Paul sang ah thagau mi zaw, he zaw leh hepina nei zaw i um diam uh? Um ding in i gingcha lo uh ahi. Ahileh, bang ziak ah kochuam kithununna (church discipline) hi dik i sak zaw ngai lo uh a hem? I thagau mi lo ziak, Pathian thu i het lo ziak leh hepina i nei lo ziak uh hi zaw ding ahi. Ahiloleh, Pathian thu/Bible i zawp nawp lo ziak uh ahi zaw diam? ti i kingaitua thak chiat diu a dawium hi.

2. Kochuam kithununna hi hepina ziak ah kibawl ahi.

Bible ziltîlna dungzui ah chun kithununna hi mudana ziak hilo in hepina ziak ahi ti hetthiam akûl hi. Hepi ziaka kithunun sek ahi. “*Lalpa’n a hepîte chu a thunun sek in, cha a lawp tapo chu a vaw sek sa lo la hem?”* (Heb. 12:6) ti ahi. “*Zia tilo ah chun, ei thunun ding taksa nu leh pate i nei chiat ui; amau chu i ja ma mau a. Zia sang ah nasazaw chun, i hinna ding un, thagaulam i Pau thu nung zaw diak lo ding i hiu em?”* (Heb. 12:9). Nu leh pa ja mi chun a nu leh pa thu a mang ding a hia; chuleh, nu leh pa hepi tu chun a nu leh pa thu a mang ding ahi. Zia gual ma chun, Pathian ja leh kicha mi chun Pathian thu a mang ding a hia; chuleh, Pathian hepi tu chun Pathian thupiak a zawm ding ahi. Zia gual ah chun, insung, kochuam leh Pathian tawh kikal ah ki jana leh ki hepina a um lo tak leh thumatlona, ki simmawna leh gitlona a um sek a; tak leh kithununa’n a zui sek ahi. Gen tak gual in, zia kithununna chu mudana ziak hilo in, hepina ziak zawk ahi. Nu leh pate’n a chateu a hepi ziak un a mawk jep ahiloleh a mawkthunun ziang uh tina ei pua; thu mang lo, gitlo bawl, ahiloleh thil bawl khial nasatak a nei ualeh vang, tunung ah a

phat diu dawina zia kin a thunun zaw sek uh ahi. Zia chu a hepi zia k uh a hia; a muda zia k uh ei puai.

3. Kochuam kithununna zia k dang khenkhat te.

Kochuam kithununna zia k hi hun tiang um ngei ding a hia, zia te lak ah hetthei dang khenkhat te chu, etsakna'n: kochuam lai ah gitlo, thanguai, ahiloleh kochuam dan in a phal lo te lak ah khat chu kochuam mi khat in bawl taleh, a lunghei thei na ding ah chun kochuam in a thunun ding ahi (1 Kor. 5:5). Zia gual ah kochuam kithununna zia k hi amasa'n gitlo bawltu'n lungheina leh ki siamphatna a nei thei na ding a hia; a thagau hukdam ahi thei na ding a hia (1 Kor. 5:5); kochuam lai ah mi dangte a puiman, a theppuk ahiloleh a gitlo sak lo na ding a hia (1 Kor. 5:6); mi dang te'n zia thununna chu chittheina ah a nei na ding uh a hia (1 Kor.5:11); chuleh, kochuam Dintu, Neitu leh kochuamte Luchang Khrista Min chungnung jaum a hithei na ding, a Min thiangtho venhim a hithei na ding leh a Min lopi gensiat ah a um lo na ding ti te a hiu (1 Kor. 5:6-8).

Thukhakna

Kochuam kithununna hi mite siatna ding leh manthaina ding ah mudana zia k ah kibawl ahi pua, 'maleh mite phatna ding leh hukdamna ding ah hepina zia k ah kibawl ahi zawi. Bible in dan chu dankal mite, dan bawtsia te leh migilote a ding ah bawl ahi (1 Tim. 1:9-11) a ti gual in, kochuam dan tawh kikal ah/dan lo gual ah umte chun kisik ah a gitlonau a hun haisan thei na ding un kochuamte'n thununna a nei sek uh hi. Kochuam leh Pathian tawh kicham ah a um thei na ding ua chun, nawsua ahiloleh thunun ah um te chun jachatna, thatdana, lungnatna leh thangtawmna ah lak lo ah; zia malak sang ah chun, kisikna, panlakna, kichatna leh kisiampnatna ah nei zawk ding ahi.

JOINT CONFERENCE

**REVIVAL AND MISSIONARY BOARD LEH REVIVAL
YOUTH FELLOWSHIP chu Pathian mapuina nuai ah
lawting tak ah matzaw ahi tai.**

Nk. ChinLily, Secy. R&MB

“La puanbuk keklian in” (Isai 54:2) ti thupi mang in, Rev. Ch. Kambawi in Speaker hina la in, Dt 27-29/Jan/2023 sung in Kangvai RCG kochuam ah malzin 200 vel tawh Pathian thagau pawna leh chawihawina pum in lopi takin matzaw ahi ziakin Pathian chu lopina I piau ahi. Zia missionary khawmpi hi a 2 vei na a hi ta, a ban ah le I mat to thei zel I lam-et uh ahi.

Dt. 27 nitak Dak 4 vel in Moderator Upa Haulal in Khawmpi hawna leh Diallap Khaidawna biakin mai ah nei in, 6:00 pm in nitak kikhawpna pat ahi tai. Kikhawpna zosia conduct ding in mi 2 guat a hui a, tunkim zan a pat kigini zan chan Pa Momoi Chairman RYF in ma a pui a, Pathianni zingkal leh nitak chu Upa Khailiankham, Vice- Chairman R&MB in a pui hi. Chun, kikhawpna zosia Nk. Kim Zina in record ei bawl piak hi.

Tunkim zan ah Upa Shila, Chairman R&MB in vaidawna thucha genna hun mang in, Rev. Liante, Bialtu Pastor in thupi genna hun a la, hundang thupi zosia chu Speaker in a mang hi.

Pathian chawihawina la ei sak piak ding in Nk. Zouzam, Ahthibung, eima Revival churches sung leh I gam sung ua lasak thiam mama I nei khat uh, chun ,Pa Hauliansang, tulai ah I gam ua lasak thiam ah hung kithang thak min a ngaisan mama khat, chuleh, Centre Choir RCG, Zawna lopi II chan a la hawng tau. A la sak uh chuailo tuchan ah Youtube ah mu thei a umzing te chial a hui a, buaina umlo kei in I programme uh ei hun uap piak ua, kikhawpna zosia Pathian chawihawina'n la te a sau.

Pathiani zingkal devotion Tv. Kh. Sang Vaiphei in ma a pui a, chun sun kikhawp pel in Ephesate lekhabu pat Bible quiz

competition ma a pui to pek hi. A nuai ah te hin kipak man ei san piak ui.

ST Hoineu P Gamhoi (first)

Mercy Kangvai (second)

Hoiremthar Molkon (third)

Kigini zan in Nk. Florence Secy. RYF in report na a pia, zia reportna a taklatna a chun a tangpi RYF in sum a munate leh a matnateu tangpi gen in, Centre Choir a ding ah pan nasatak la zing a hi dan teu a gen hi. Choirte panlak dan leh RYF in bangkim ah delzui a hi dan teu gen in, nu leh pa ei tawsawt tute kiang ah kipakthu gen kawm in, panpi ngai a ki hi chan ah ei panpi ding leh theitawp sua RYF in malam sawn ding ahi dan te a gen hi. Chun, Pathianni zan in Finance Secy. elected Upa Lalthamuan a pat in ngai thak a hi ki bawk hi. Khawmpi panpina a kiphut gual tak ah ahung lut nailo zia in khawk a sak danthu a gen a, a hin Pathian hatna zalin mualpho diaklo ding a hi dan uh a gen bawk hi.

Pathiani sun in RYF ten kipak man thilpiak hun a mang ua a nuai a gual hin piak a hui.

Khawtin ah RYF box khetam pente Pathumna chan kipakman piak chiat a hui.

Thaphut pekim masa pen: Gotangkot

RYF box Sum Tampen: Gotangkot

RYF Box hawng hawipen: Hill-Town

Target pekim masapen te: Gotangkot, Hill-Town leh Molkon.

RCG Executive Secy.Rev.Dr. Khupkam Vaiphei in le hun mang in, choirte kipakpina leh thikhona thu a hun gen ah, choirte kithuapi na'n le dangka 10,000 a pia, kipak a um mama hi.

Pathianni zan in Tv. Boisawn, Vice- Chairman RYF in kipak thu genna hun a mang hi. kipakthu genna a pat masang in mipite a

ding ah dawtna pani a dawng ah, zia chu kua a hiu em missionary? Khawi ah bang a bawl ding uh a hem? Ti ahi. zia chu kua tawbang mi 3 in a dawnhu ding uh a hi. Ziana chun, Nu Chinneilian, Nk. Lily leh Tv. Naulun te'n a dawnhuu ah, ziate lak a chun Nk. Lily dawnhu dan chu speaker pa lunglam hi ding dan a hi, kipak man board ten dangka 500 a pe ngal ui. Zia hunmat zaw a chun kipakthu genna hun a mang zawm hi. zia a gen kimkhat te chu:

Nausen nei nu tawmngai khawmpi hung pangte chung in kipakthu a gen masa pen hi.

Programme lawtinsaktu mipi hung khawmte chung in.

Speaker pa chungin kipakthu a gen gun mama a, ziagual ma chun invited artist te chung in le a gen zawm hi.

RCG choirte kipakpi na in Assembly in a thupukna dungzui uh leh ki tawsatna in dangka 10,000 a piak na chung un,

Programme ah min chuang ah hung supiting te chung.

Mission puitu khawmpi hun uap te leh

Khawtual kochuamte.

Chun, speaker te nupan leh invited artist te kipak man thil piakna hun le mang zawm in Upa Shila Chairman R&MB in piak dawna hun a mang hi.

Speaker pa lawinu suapi Bina hin le a testimony chawmcha genna hun a mang a, Hindu background a pat ei gingu a hung hi dante gen in mipi lungsiatna a dawng mama hi.

Zia nitak a hin, speaker in mipi gamthim a ding ah ginna thutiam challenge a bawl a, a nuai a gual a hin lekha kizik/pledge card hawm ahi.

Thagau mangthai matna ding leh Pathian lalgam ah nasepna ding in kenle.....

Kha tvei thu in.....tuak ing ka.

Thasin in.....tuak ing ka.

Kum khat ah thum vei.....tuak ing ka.

Kum khat ah ni vei.....tuak ing ka.

Kum khat ah khat vei.....tuak ing ka.

Hun tiam umlo, kanei dungzui zel in pia/tuak ingka.

.... Ti in zia a nuai a hin ka min leh ka khaw min zik in kitiamna ka nei hi.

Min.....

Khua.....

Ti ah zik ahi.

Puaknatna sangtak nei pum in mipi chialnan a siam a, mi 95 te'n kitepna a nei ua, mi 39 in a sum/paisa le a pe ngal ua, mi 56 te'n a lemchan hun ua pe ding in. Akigawm in dangka 32,880(a pe nailote a panglo) vel a pha ahi. Pathian lopina chang ta hen!.

Thu genna zosia “La puanbuk keklian in” ti thupi mang in, point tamtak mangcha'n a tangko pi a, missionary chu midang hilo in ei uh I hiua, gamthim nasepna chule kawlgam- vaigam hilo in, I lawi leh pai Pathian helote kiang a hi dan kichian tak in a gen hi.

Zan kikhawp pel in Rev.Dr. Khupkam Vaiphei, Exe. Secy. in khawmpi khakna leh Diallap khaithakna nei in hun chu Chai a hi tai.

Tuchung I khawpi nau hi lawting a ki sa mama a, tunna, giakna, nek leh chak, damlo hitan leh eisubuai thei daltu bangma umlo ah I matzaw thei uh hi lawtinna khat ahia, zia chunglam a chun thugentu thugen haw hin mipi lung a sulim a, akipaksak mama a mipite maisua le tai thei mamau a , kipak mel leh lim mel a puau ahi. Bangkim Pathian hatna ahi. Gamthim liantak salvak ding in Pathian in I khawmpi nau hun malsawm taken.

SUNPINA

A chiata tarik 26th-January-2023 nikhan Pro/Pastor M.Oken Meeitei in ana asepi piak Pathian angin eila chawlsan taak ziakin, Mission ah aseppi te bep hilo in kochuam ah member zosian le a insung mite thawkna I thawk piu in, I sunpi tak zet uh ahi. Ama P/Pastor pa hi 15 March 2019 kum ah Mualkonbung ah Annual Council a khan Probationary



Pastor piak ala hia, tukum March 2023 kum ahin full Pastor ordain ding bep ah um ala hi ahi. Maleh lalpa lemguat dan te hi mihiam in het haksa ahi ziakin gen ding umlo in, it umtak in ei nutsia tak ziakin, kochuam tin in pauchapnan a nutsia a insung mite leh kochuam te a ding in hezing hitiu. Ama hin adam lai in Jail ministry taw athua in, RCG a dingah meiteigam ah kineppi umtak khat ala hin ahi. Ahungtung ding tarik 4th-February-2023 kiginni le amau nam chawndan dungzui in sorat mat hiding ahin, zia ni hile mission ten January thalaw taw panpi theina dang dang taw panpina piak dingin phatsak ahi ziakin, a chia thei thei chiakhawm ding in le iki hetsak un ahi. Akivuini khan Upa Lamshila chairman Revival and Missionary Board (R&MB) in a zi kithuapina gual ah thasin family pension piak ding in ala gen daw gual in, zia chu le meeting phat le genkhawm dingin um ahi. Ama (L) P/Pastor M.Oken thasang dingin I umna mun chiat un pauchapnan Pathian dawng zing hitiu unaute. Chuleh, meiteigam ah missionary na isepnau haisan chuam diak lo in Lalpa kiang a dawn zing pum in pan lazel dingin chialna le ka hun nei ngal hi. Lalpa'n P/Pastor (L) M.Oken in anutsia insung mite hun thamuan in hun umpi zing ta hen.Amen.

PAUCHAPNA HETDINGTE

- 1) General Standing Date; 9th-February-2023 leh P.Gamhawi ah umding hi buaina umlo ah lawting takin mat ahitheina ding.
- 2) Tu leh tu ah damlo Hospital AIMS Delhi ah ki enkawl zing ah um Nu Khawlneihat @ Hatnu Mualkonbung Hausapi ahungdam daw theina dingin dawn hitiu.
- 3) P.Gamhawi Mission gam ah innmun la ten inn kilawm tak tak ahun sak daw vak thei na ding un.
- 4) Lawklaiphai khua leh gam ah RCG kochuam mun leh Gam ding kichawkna mun ah tu ah buaina ziak ah inn leh Biakin kisa thei lo ah um pen hi buaina ahung navak ah inn leh Biakinn dingte sakdaw ahi theina dingin.
- 5) Zillai te adiakin class X & XII te February-March 2023 leh Board Exam dingte a dingin.
- 6) RCG gamsungah semding Evangelist cum Revivalist ding mamawzing dawn hitiu.
- 7) RCG, Head office mun ah Center Church building puaphat ahitheina dingin.

KIPAK THUGENNA

Zion thusuak Annual Subscription fee **July** 2022 apat **January** 2023 sung tiangah hun piate amin uh ka hun taklang in, chuleh alengua chungin Zion Thusuak board ten kipak thu ka hun gen uh ahi.

1. Pa Isak HQ veng	Rs. 100/-
2. Pa Henkhulun HK Phai	Rs. 100/-
3. Rev.Kamthang HK Phai	Rs. 100/-
4. Pa Paukhai Phovaibi	Rs. 500/-
5. <u>Pa SL Kamlal L.Vaiphei veng</u>	Rs. 1,000/- *
	Rs. 1,800/-

*Patron Member

H E T S A K N A

Mimal kua tawbang Kochuam sungah sawm ah khat piatheilo, chuleh Zion Thusuak lakman hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

- ❖ Account Name: Revival Church of God
- ❖ Account Number: 11343704608
- ❖ Bank Name: State Bank of India
- ❖ Bank Branch: Churachandpur Main branch
- ❖ IFSC: SBIN0006182
- ❖ Branch code: 6182
- ❖ MICR Code: 795002504

ZION THUSUAK PATRON MEMBER TE

- 1) Electeded Upa Lalthang, Pakeng veng
- 2) Nu Niangneu, HQ Veng
- 3) Nu Lily, T.Munjang
- 4) Nu Samboi Vanghoiphai
- 5) Pu GL Muana Neitham, Gochinkhup veng
- 6) Upa K.Kama HQ veng
- 7) Pu SL Kamlal Vaiphei, L.Vaiphei veng, Imphal

- ❖ Patron members kum 3 (thum) 2020 apat Rs 1,000/- hita ahi.
- ❖ Life member dingin 5000/- ahi.

-Editor, Zion Thusuak Board

Collector/Magazine Agent:

Sl. No.	Min	Area
1	Tv. Douminlun	Hilltown
2	Tv. Lalroman	T. Munjang
3	Pa Paelim	Kangvai
4	Upa Tongjang	Imphal
5	Upa Khailiankham	Nakhujang
6	Upa Manglun	S. Elimphai
7	Upa Liankhai	S. Kanan
8	Pa Mangminlun	Gawtangkawt
9	Upa Nekpu	Jordanphai
10	Tv. Hauginlian	Bewlahland
11	Upa Mamang	Mualkon
12	Pa Ts. Boipu	Mantripukhri
13	Pa Lenghau	Vanghoiphai
14	Pro. Prastor Lianboi	P. Gamhawi
15	Upa Lalla	Vaiphei Veng



Upa S.Haulal
Moderator RCG
in Khawmpi
Diallap khaidaw
pet

RCG Center
Choir te Chunga
kipakna suklatna
in sum cheng
singkhat piakna



Place : Kangvai RCG Church



R&MB Secretary Nk Chin Lily in Khawmpi Speaker Rev.Ch Kamboi te
Nupan puansil apiakna

BOOK POST

RNI Reqd. No. 34293/80

To,

.....

.....

Stamp

If undelivered please return to:

The Editor
ZION THUSUAK
RCG Head Office
Thangzam Road, Hilltown, Churachandpur, Manipur
PIN – 795128, P.O. Box No. 91
Email: rcgmission@gmail.com
Website: revivalchurchofgod.org
Contact: +91 9612652209 (Exe. Secy.)